



Inatsisartunut ilaasortamut  
Jens Napātōk'  
Naleraq

02-11-2022  
Suliap normua 2022 - 20213  
All. 21647502

Postboks 260  
3900 Nuuk  
Oqarasuaat (+299) 34 50 00  
Nassitsigasuaat (+299) 34 66 66  
E-mail: iian@nanoq.gl  
www.naalakkersuisut.gl

**Meeqqanut inuusuttunullu isiginiarnermikkut innarluutilinnut tapersersuineq pillugu § 37  
naapertorlugu apeqqummut nr. 192-2022-mut akissut**

Asasara Jens Napātōk'.

Apeqqutinut qujanaq. Apeqqutit tullinnguuttuni uteqqinneqarput, akissutinik tulleqarlutik.

**1. Naalakkersuisut ilisimatissinnaavaanga, sooq Isumaginninnermut Aqutsisoqarfiup Synscenter Refsnæs-  
imik aamma Rigshospitalimi Synsregisterimik suleqateqarnissamik isumaqatigiissutit  
31.12.2021-mi atorunnaartissimanerai?**

01.01.2011 aallarnerfigalugu innarluutilinnik isumaginninneq kommuninut nuunneqarpoq. Tamatumani inunnut innarluutilinnut tapersersuinissamik sulissutiginninnerit kiisalu inunnut innarluutilinnut siunnersuineq ilitsersuinerlu tamarmik ilaapput. Synscenter Refsnæs-imik isumaqatigiissut sulinermi tassani kommunit tapersersorniarlugit neqeroorutaavoq.

Suliap suliarineqartarnera eqqarsaatigalugu kiisalu innuttaasut amerlassusaat eqqarsaatigalugit neqeroorummik iluaqateqarniarsinnaasut isumaqatigiissummut naleqquttuunngitsut Isumaginninnermut Aqutsisoqarfiup nalilersimammagu, Isumaginninnermut Aqutsisoqarfiup (Socialstyrelsen) Synscenter Refsnæs-imut isumaqatigiissut nutartersimanngilaa.

Isumaginninnermut Aqutsisoqarfiup Synscenter Refsnæs-imik isumaqatigiissummini Rigshospitalimi Synsregistret ilanngutissimanngilaa.

**2. Meeqqanut inuusuttunullu isiginiarnermikkut innarluutilinnut suliniutit suut paarlaallugit ingerlanneqarpat, qanorlu iliorluni pineqartup iluani immikkut ilisimasalinnik atuiunnaariartunnginnissaq qularnaarneqarpa?**

Tassunga ataqatigiissillugu inuup isiginiarnermikkut innarluutillip tapersersornerata aamma Peqqinnissaqarfimmi isikkut nappaatillit katsorsarnerata immikkoortinnissaat pingaaruteqarpoq. Meeqqat inuusuttullu innarluutillit tapersersorneqarnerannut matumani ilanngullugu isiginiarnermikkut innarluutilinnut kommunit tamakkiisumik



akisussaasuupput, Inuit innarluutillit tapersorneqarnissaannut Inatsisartut inatsisaat nr. 13, 12. juni 2019-meersumi § 8 imm. 1 takuuk.

Naalakkersuisut "Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaannik Kalaallit Nunaata malinninnissaa pillugu iliuisissatut pilersaarut"-issaat, innarluutilinnut tunngasunut kommunit Isumaginninnermut Aqutsisoqarfimmiit Pissassarfimiillu qanoq tapersorneqassanersut pillugu saaffiginnissutigineqassaaq. Suliassat annertussusaat suussusaallu kiisalu innarluutilinnut tunngasuni sullinniakkat ataasiakkaat matumani ilaatigut pineqarput.

Meeqqanik isigiarsuttunik misiliinermut isillu nappaataasa katsorsarnerinut Peqqinnissaqarfik aalajangersimasumik ingerlatseriaaseqarpoq. Meeraq isigiarsuttuusoq pasitsaanneqarpat meeqqap isigisinnaassusia misilinneqassaaq. Isigisinnaassutimik misiliineq isinut tunngatillugu inunnit qitiusumik inissisimasunit soorlu peqqissaasumit imaluunniit peqqissaanermi assistentimit misiliinissap suliarinissaanut ilinniarsimasumit suliarineqartassaaq. Taamatut iliornikkut meeraq isaruartaarnissaminut isinut nakorsamik immikkut ilisimasalimmik tikittoqarnissaanut utaqqisariaqassanngilaq. Tamatumunnga pisariaqartitsisoqarpat meeraq isit nakorsaannit naliliiffigineqarnissamut innersuunneqassaaq, tullianilu immikkut ilisimasalimmik tikeraartoqarpat takuneqarluni. Isit nakorsaasa angalasarnerinut immikkut ilisimasalinnut tunngatillugu Peqqinnissaqarfik Glostrupip Napparsimavianik isumaqatigiissuteqarpoq. Nunap immikkoortui tamarmik immikkut ukiumut ataasiarlutik isit nakorsaannit tikeraarneqartarnissaat anguniarneqarpoq. Meeqqat ataasiakkaat arlaqartut paasiuminaatsumik isimikkut nappaatillit Glostrupip Napparsimavianut misissortinneqariartortarput kingusinnerusukkullu misissorneqartarlutik.

Inussiarnersumik inuulluaqqusillunga

Mimi Karlsen